



Union di Ladins de Gherdëina
tel. 0471 796 870
e-mail: info@ulg.it

Criteres per publicazions y cunlaurazions

1) Chëi o chëles che à ntenzion de publiché n liber o fé vel' auter proiet n cunlaurazion cun la ULG dëssa tò su cuntat danora cun la ULG per rujené dl cunzet editoriel y per stlari i vares de lëur che ie udui dant tl cajo de na resposta positiva.

2) L cunsëi dla ULG (o la grupa ladinVif sce l se trata de publicazions per mutons o jëuni) valutea, n cajo nce ti damandan a esperc, sce l unirà a se l dé na cunlaurazion o no. Chësta dezijion vën tëuta aldò de chisc criteres che vën do.

Criteres per duta la publicazions:

- L cuntenut ie de nteres publich per l mantenimënt y l svilup dla rujeneda y cultura ladina.
- L cuntenut possa vester nuef, mo nia publicà o nce na traduzion o traslatazion. N cajo che l se trata de na traduzion o traslatazion se cruzia la ULG a damandé i dërc de autëur. Cëla pont 3.

Criteres per...

- publicazions per mutons: L cuntenut dëssa vester tler, nteressant, criatif y tré l nteres di mutons. L ie bel sce la storia à n cër' message che lascia crëscer i mutons. De bon uedl vëniel nce udù cunzec nteratives, ulache mutons possa vester atives y nia mé passives. I dessënies dëssa vester tleres y adatei per i mëndri.
- publicazions scientifiches: La ULG ne publichea nia libri pseudoscientifiches. L muessa unì respetà i criteres de publicazions scientifiches. Chësc uel di che i cuntenuc muessa vester fundei sun funtanes (p.ej. testimonianzes o d'otra publicazions scientifiches).
- publicazions letereres: L cuntenut muessa vester de nivel leterer. L vën tenì cont dl cuntenut, dla creatività, dl'esprescion, dl lessich y dla forma.

3) Sce l cunsëi dla ULG à fat ora che la publicazion vën data ora se cruzia la ULG de damandé preventifs per la mpaginazion, la stampa y n cajo nce per la ilustrazions, fotografies, letorat, dërc o auter. Chi che vën nciarià chier ora l cunsëi n cunlaurazion cun i/la autëures.

4) Finanziamënc

La ULG ie na lia de ulentariat. Ntëur al 70% di custimënc vën sustenii dala Cultura Ladina (Provincia)

o dal Ufize per la mendranzes dla Region Trentin-Südtirol. L rest pudons n pert purvé a curi cun l sustëni di Chemuns o de sponsors. Sce chësc dut ne tleca nia muessa la ULG paië l rest. La ULG davania si scioldi dantaldut cun l lëur de ulentariat p.ej. tres l Calënder de Gherdëina che vën fat defin da ulenteres (ora che grafica y stampa) y zënza cuntribuc publics.

De regula ne n'iel nia udù dant n paiamënt di autëures, nce sce valorison sambën dassën che l vën scrit per ladin. Sce l autëur se l damanda, valutea l cunsëi da cajo a cajo sce l ie mesun remuneré nce chëi o chëles che scrij.

5) Duta la publicazions dla ULG vën scrites cun l'ortografia ufiziela dl Istitut Ladin.